



福建行一輪

讀萬卷書，行萬里路。一個教歷史个先生，頭希望會用像太史公司馬遷遐款「二十而南游江、淮，上會稽，探禹穴，闢九疑」。拈課本內講著个抑係自家想討觀察个人、事、物親身去睇一遍，頭好係摺會用翕相轉來。堵好今年歇熱个時有一個機會去福建行一輪。雖然無法度行透透，毋過多少嘛有睇一兜。七月半返站，先去臺中坐飛機去金門，正過對金門坐船去廈門。金門和廈門單單係隔一水定，真近，大約半點鐘即到位啊！

這回來福建睇著个有幾下點印象較深刻个係，大陸這幾下年來个進步全然个緊，在車嶺睇出去，一棟一棟新个大樓一直起。舊屋嘛真有特色，毋管係一樓、抑係二、三樓攏係疊磚子个較多，甚至外壁睇起來即係磚子。這位討去別位，坐車愛坐真久，代表大陸實在闊，所以坐動車會較緊。討坐動車个時，在車頭外頭即會睇著一輛特警个車歇在遐。討入去車頭，像海關有真嚴个安全檢查。行李愛過掃描，人嘛愛安全檢查，車廂內底嘛有安全人員，所以討坐動車愛量早到位。車頭內底真闊，衛生間嘛真現代化，毋過有一兜人會在內底食薰，所以有淡薄臭味。

沿路睇來，外頭百姓騎个攏係電動車。毋管係兩輪抑係三輪，小輛四輪拼裝車，做一下攏係食電个，睇毋會著奧多拜。這點和臺灣个「奧多拜水沖」真無共款，代表大陸个充電站真利便，電動車个政策做了真徹底。這幾下日換幾下个導遊，各各攏真勢講，對在地个文化、典故攏講到真清楚。福建頭有名个風景區係武夷山，遊覽車單單會用駛到風景區門口，買門票入去了後愛摺坐接駁車。去遐毋單會用跋天游峰，頭好賞个係去坐竹排，對上頭坐竹排順流落去。遐正經係用竹編个竹排，一座竹排面上會用載六個人，逐個人著救生衣了後，即有兩個撐排人拈竹排撐行。沿路青山綠水，有時務摺睇會著猴家族出來賞，水底个魚全然多，飼料一出手，隨得魚食淨。頭特別係山壁面上有嶄然多个懸棺，這係到今難解个謎。武夷山个大紅袍茶米，嘛係真多人來到武夷山愛迂轉去个等路。

別儕个缺點，自家提來警惕。別儕个優點，偲人撿起來學。像電動車、像風景區自然風景个保護和經營，對在地產品个推銷，這兜攏值得偲人來學。坐動車个安全檢查，得人感覺無像臺灣坐高鐵恁自由自在。所以這回福建行一輪，毋單係留下真多个相片，嘛得偲增加真多个見識。

作者：李秉璋

☆詞彙學習☆

【行一輪】hang` rhid` lin`：走一圈，走一回。

【衛生間】bbui sen` geen`：中國大陸稱廁所為衛生間。

【幾下】gia+：詔安客語的合音字，將 gi` ha 兩字合讀成一個音 gia+。

【奧多拜】o do bai`：機車，或稱為摩托車。

【疊磚子】teeb` zhen` zu`：砌磚塊。

【水沖】fi` cung`：瀑布。

【別位】pe bbi：其他地方。

【上頭】shong` teu`：上游。

【動車】tung cha`：中國大陸稱高速鐵路為動車。

【懸棺】bbien` guan`：武夷山的先民將棺柩半插懸崖峭壁洞內或以木椿支撐，為古越人特有的習俗。

【車頭】cha` teu`：車站。